



DER BISCHOF VON BOZEN-BRIXEN
IL VESCOVO DI BOLZANO-BRESSANONE
L VESCVL DE BULSAN-PERSENON

Stimeda surans y stimei fredesc te nosta Diozeja Bulsan - Persenon!

Recunescënza ne ie nia me na cuestion de maniera. Recunescënza ie n computamënt che desmostra coche un uel viver. Mo deplu: la recunescënza ie urazion. Canche ringraziament se rendons permò cont che ne son nia boni de viver zënza i autri, che on de bujën di autri y che i adurvon. Ringrazian recunescions che l nes vën scincà zeche: Nëus respundon al amor che nes vën scincà.

DA CIE CAPËSCIUN PA CHE SON CRISTIANS?

Gejù nes dà na risposta tlera: „Da chësc cunescherà duc che sèis mi discepoli, sce arëis amor l un per l auter.“ (Giu 13,35). Se giauri de viers dla persones nes gëura la streda a Die.

Vester Cristian uel di viver adum cun Gejù Crist; chësc raport se concretisea tl servisc per y cun la jënt. L amor al proscimo ie la cherta d'identità cristiana, la ndesfideda che mèt ala proa nosc amor per Die.

LA DIMENCIONS FUNDAMENTELES DLA DLIEJA

Servisc al proscim, liturgia, la bona nuela, la vita per la comunità: chësta cater dimencions toca adum y fej ora la sustanza dla dlieja. Chësta cater dimencions realisea deberieda l vester cristiani. Perchël ve ncurajei a manteni duta la cater dimencions te n bon balanz ënghe sce chësc ne ie nia for sauri. Chël che vën perdicà y festejà la dumënia muessa nce mo valei l lunesc do.



DAUJIN Y DEBERIEDA

Dala caritas tla pluaries ala comunitates ti cunvenc, dal KVV ala ACLI, dala grupa de San Vinzënt ala Unitalsi y ai trüep culaburadëures tl ciamp saniter y dla istituzions soziales che à fat n lëur de gran valor dant al dut tl tēmp dla pandemia: on la fertuna de avèi persones che se dà da fé a ti judé ai autri y a realisé tres chësc na sozietà solidala. Duta chësta persones porta prò a mëter ndrova tla vita da uni di la bona nuela dla bibla; ëi và ncantëur a lauré fina sun i ëures dla sozietà, và a cialé do y và a scuté su. Èi ti juda a vester boni de judé se nstësc - tres aiuc finanziaei, tres de bona paroles, tres i avisé de viers de istituzions profesciuneles sciche la caritas dla diozeja. Messon vester cuntēnc che on tel istituzions, ma ne pudon nia me ti sburdle dut sun ëiles. Caritas y solidarità ie na ncëria per nëus duc.

SOLIDARITÀ CUN I PLU DËIBLI DANter NËUS

L dà na respunsabiltà individuela che ne po' nia unì sbudleda demez o sëurantëuta da d'autri. Nëus duc son damandei canche la se trata de pertēnder de manco, de sparti deplu y pratiché na solidarità concreta. Do na vijion cristiana ma nce umanistica toca la scunanza di dëibli, unfat chiche i ie, pra l vester dla persona. Chiche dà su la scunanza di dëibli, dà su l'identità dla persona. Nëus messon avèi l curaje, la ulentà y la forza de ti dé plu pëis al bën soziel che ai nteresc y ala ghiranzes de singuli y de cërta jënt. Nëus adurvon na pulitica che se ativea per i dëibli y per chëi che ne à nia tan da di y che se tol nce la respunsabiltà per la generacions che unirà.